

Gaollaolsail

Gevq-a nail gaq

Haoqgavq niil keiv neq, Gaqkhoel Paolluv-i mail geqv-a nail ngaol. Gaollaolsail nail haoq-gavq iqmoeq ilmoeq bhai maqkhaiq, haoqnao naosaq bhai maqkhaiq, Paolluv aivq-i mail geqv-a nail ngaol dai, geqv-ai thaq nail ngaol. Milnee uqnee khe Khali yaq juq iqsanl, Paolluv-i mail geqv-a nail ngaol dai, noeq nail ngaol.

Gevq-a nail aqyanq khi aqduq

Gevq-a nail aqyanq neq, A.D. 60-61 kovq bhai ngaol. Gaollaolsail haoqgavq neq, gaqkhoel Paolluv Lolmav meenq khe thaonq bhai iqmoeq ilmoeq bhi nieivq bhoel-u pov geqv-a nail ngaol. Gaollaolsail haoqgavq iqsanl, thaonq bhai aol khi geqv-a nail haoqgavq al juq nail lavqkhoel bhai aol nail ngaol.

Khaq sil gaq bhai geqv bhiq-a nail

Haoqgavq niil keiv neq, Gaollaolsail meenq khe Khali yaq munl bhai geqv bhiq-a nail ngaol. Gaollaolsail Khali yaq munl neq, gaqkhoel Paolluv-i mail daoqthaoq thaoq-a nail maq ngel-ail. Gaqkhoel Paolluv aqyu juq bhai moel iqsanl maq moel dai haq-al. Thailhai ngaol-aq, aivq Eilpheilsu meenq bhai hail kovq jaol khi cavq bhiq cov bhiq-u phao, aivq-i mail cavq bhiq cov bhiq-a nail tsaol-aq, Gaollaolsail meenq bhai lavqkhiq tsail nail geeq laoq dao cavq lai khi, Khali yaq pevq lal-a nail ngaol.

Khul bhai noeqthunq khi gevq-a nail

Gaollaolsail meenq bhai jaol nail Ilbhaqphaoq-dil Paolluv jaol nail bha lal khi, a bhai khe Khali yaq munl-i mail noeq bheeq-ai thaq nail ganl ge bhiq lal-a nail ngaol. Ganl al neq, aoldaoq kovqdaoq bhai neema eeq nail, aolsaolkovq nl nail bhai taivq-ail saol-nvq nail, nqtavq gaqkhoel bhai uqhuq thaog khi Khali bhai heldaiq theq nail ngaol dai, ge bhiq-a nail ngaol. Alheel ngel-i mail, Paolluv Gaollaolsail meenq khe Khali yaq munl bhai ganl niil juq aqmeeq-ai bhi heeq nia movq nail ngel-i mail, haoqgavq niil keiv gevq bhoel-ai leevq-a nail ngaol.

Iqmoeq ilmoeq khe daoq

¹⁻² Ngal neq, Miqyail neema tsaq nail ngel-i mail, Yeiqsul Khali nail yaqkav jiovq thailthaiq nail Paolluv ngaol. Jaqbheq Tilmolseiq nv-nvq gaq Gaollaolsail meenq bhai jaol nail Miqyail nail tsaol-aq juq bhai haoqgavq niil gevq bhoel-ai leevq-a nail ngaol. Nuljuq neq, Khali bhai saljial ivq nail aqivq jaqbheq juq ngaol. Ngadao nail Aqbhu Miqyail nail geeqlaoq eeljaol khi neesal-ovq nail pha q nuljuq nail kovtavq bhai jia v dei-eiq.

Miqyail bhai tsiqeeq nail geeqlaoq hal daoq

³ Nvjuq nuljuq nail haqbhoil geeqlaoq hal-u phao, ngadao nail Heeqphaq Yeiqsul Khali nail Aqbhu Miqyail bhai khaq mao iqsanl tsiqeeq nail ngaol. ⁴ Khul khi mail dai ngal-aq neq, nuljuq Yeiqsul Khali bhai neema thaqtsaol nail ganl maqkhaiq, nuljuq Miqyail nail tsaol-aq iqsanl

bhai gaiq-a nail ganl maqkhaiq, nvjuq ya gaiq-a nail ngaol. ⁵ Nuljuq nqtavq kovtavq bhai jiav nail geeqlaoq bhai noeqthunq nail ngel-i mail, alhai neema thaqtsaol khi gaiq-a nail ngaol. Noeqthunq nail al pha q neq, maldil tsaq nail lavqkhiq tsail nail geeqlaoq daoq cavq nail bhai, nuljuq aq-u nee ya gaiq-a nail ngaol. ⁶ Lavqkhiq tsail nail geeqlaoq daoq niil neq, nuljuq jaol nail bha kev lee-a nail nee ovqtavq, miltsaq kovtavq bhai doi dai aqheeq heeq lee khi eeq lal nail khe-ai, nuljuq ya gaiq khi Miqyail nail geeqlaoq eeljaol maldil tsaq nail lavqkhoel bhai ya heeq nia-u n-gaol nee mail, nuljuq nail lavqkhoel bhai iqsanl aqheeq heeq lee khi eeq lal thailthaiq nail ngaol. ⁷ Nvjuq nee mail teevq gaq khe-ai ganl nl nail, nvjuq mao-ail gaiq-a nail llbhaqpphaqlal bhaqda nee nuljuq lavqkhiq tsail nail geeqlaoq daoq al ya gaiq-a nail ngaol. Aivq neq, nvjuq nail haqbhoil saljial ivq nail lavqkhoel nee Khali nail ganl nl nail gaq ngaol. ⁸ Aqhaqlal Miqyail bhaqda nee nuljuq-i mail ya-a nail goil nail gaiq-a nail ganl al, niil aq-il, aivq nvjuq bhai ge lavq-a nail ngaol.

⁹ Alheel ngel-i mail, nuljuq nail ganl bhai nvjuq ya gaiq-u n-gaol nee, nvjuq nuljuq nail haqbhoil maq naq lai dai, geeqlaoq hal nail ngaol. Aqhaqlal Miqyail phao khe neeno eq neekha khi noeqheeq noeq dov nia nail iqsanl nail lavqkhoel nuljuq Miqyail neema tsaq nail pha q bhai teevq bhee teevq lovq heeq nia lal dai iqsanl, nvjuq geeqlaoq hal nail ngaol. ¹⁰ Nuljuq alhai heeq nia lal haq neq, Heeqphaq Yeiqsul bhai geel-nvq nail khe-ai, aqdoevq doevq khi, yaoq pha q

yaoq-ao nee nail lavqkhoel aivq nuljuq bhai neekhaol sil nail ngaol. Al ovqtavq, nuljuq aqmeeq yaoq pha q yaoq-ao nee nl nail hal nail lavqkhoel nee aqheeq heeq lee khi Miqyail bhai teevq pov nee teevq pov heeq nia jaiq lal nail ngaol. ¹¹ Bhaqaoq mao-ail eeq nail Miqyail nail seiqleiq khaoqsail bhaqda nee, nuljuq lavqkhiq teevq tsail neema ivq nail lavqkhoel yaoq pha q yaoq-ao nail lavqkhoel bhai ol nia dai, Miqyail nuljuq bhai bhaqaoq bivq yaoq dai iqsanl, nvjuq nuljuq nail haqbhoil geeqlaoq hal thailthaiq nail ngaol. ¹² Aqbhaq nail milkhaoq lavqkhoel aivq nail tsaol-aq juq nail haqbhoil, lainq-ai tha q nail geeqlaoq bhai ya nail geel-nvq dai, nl lavq-a nail Aqbhu Miqyail bhai, nuljuq lavqkhiq teevq tsail tsiqeeq yaoq.

¹³ Aqbhu Miqyail neq, aqnav nail bhaqaoq lavqkhoel nee ngadao bhai bhi jel-ail lavq khi, aivq mao-ail gaiq-a nail aivq nail Yaqyov nail milkhaoq lavqkhoel bhai bhi aol lai lavq-a nail ngaol. ¹⁴ Yaqyov al gaq ngadao bhai hevqkovq lavq khi, oeqbal iqsanl mail phaiq lavq-a nail ngaol.

Yeiqsul khi mail aivq nail ganl juq

¹⁵ Tsaol-aq yaq Miqyail bhai maq moel nia-ail. Yeiqsul bhai moel haq neq, Miqyail bhai moel-a nail khe-ai dul nail ngaol. Khal teivq-ai tha q nail yaoq pha q yaoq-ao nee nail kovtavq bhai Yeiqsul neq, aqivq ivqsaq gaq ngaol. ¹⁶ Nqtavq kovtavq khi mail miltsaq kovtavq bhai khal jaol khal jiav nail juq maqkhaiq, moel lal nail juq khi maq moel lal nail juq maqkhaiq, nqtavq khi miltsaq

nail gaiqlaq bhai uvthaiq nail juq maqkhaiq, bhaqaoq eeq nail juq maqkhaiq, eeq nail heel nail juq maqkhaiq, heeqphaq juq iqsanl bhai maqkhaiq, Yeiqsul bhai juq khi Miqyail-i mail teivq-ai thaq nail ngaol. Yaoq pha q yaoq-ao nee aivq nail lavqkhoel-ai teivq-ai thaq nail ngaol. Yaoq pha q yaoq-ao nee aivq nail haqbhoil teivq-ai thaq nail ngaol. ¹⁷ Khul teevq pha q iqsanl maq doevq maq jaol lal-u nee mail, Yeiqsul aqdoevq doevq khi jaol thailthaiq nail ngaol. Yaoq pha q yaoq-ao nee aivq nail lavqkhoel bhai ivq khi doevq thailthaiq nail ngaol. ¹⁸ Aivq neq, Khali yaq munl nail uqhug ngaol. Khali yaq munl neq, aivq nail aqmaol ngaol. Aivq neq, iqmoeq ilmoeq khe gaq ngaol. Aivq neq, yaoq pha q yaoq-ao nee nail lavqkhoel meeq jaiq bhee jaiq nail iqmoeq khe gaq pevq lal dai, iqmoeq ilmoeq doevq kovq lal-a nail gaq ngaol. ¹⁹⁻²⁰ Miqyail nail bhee lovq nail pha q iqsanl mail Yeiqsul nail lavqkhoel-ai aol lal khi, lavqyavq kovtavq bhai il lee-a nail aivq nail aqsivq bhaqda nee, miltsaq kovtavq-ai khal jaol khal jiav nail juq maqkhaiq, nqtavq kovtavq bhai khal jaol khal jiav nail juq maqkhaiq, yaoq pha q yaoq-ao nee Miqyail bhai tsaq lal jil lal dai, Miqyail neekhaol sil nail ngaol.

²¹ Jel lal-u phao, nuljuq Miqyail nee gaoqceiv ceiv ail-a nail ngaol. Nuljuq haqeiv nail pha q nl-a nail ngel-i mail, nuljuq nail neema lavqkhoel nee aivq bhai neejiav jiav nail ngaol. ²² Thailhai ngaol-aq, aqsivq haqjoil bhao nail Yeiqsul nail aqmaol khanq sil-a nail ngel-i mail, niil aq-il nuljuq Miqyail bhai bhi tsaq bhi jil lal dai, Miqyail nl-a nail ngaol. Aivq alhai nl nail neq,

nuljuq bhai tsaolmeeq tsaolhaol, oeqbal thaq duq maq jiav nail tsaol-aq khi, yu khul dai ge duq maq jiav nail tsaol-aq bhi pevq lal khi, aivq nail sivtavq bhai ya aol kev lai nail dai khi, nl lavq-a nail ngaol. ²³ Alhai pevq lal dai, nuljuq-i mail neema thaqtsaol-a nail pha q ivqdao dai, nieivq thai q dal laivq yaoq. Nuljuq-i mail ya gaiq-a nail lavqkhiq tsail nail geeqlaoq daoq bhai tavq nail noeqthunq nail pha q bhai tha q khaonq ha. Nqtavq nail kov-uvq bhai khal teivq-ai tha q nail yaoq pha q yaoq-ao nee bhai, lavqkhiq tsail nail geeqlaoq daoq al yu cavq bhiq nail ngaol. Ngal iqsanl, geeqlaoq daoq al cavq bhiq thailthaiq nail gaq pevq lal-a nail ngaol.

Paolluv-i mail Khali yaq munl nail haqbhoil yaqkav jiovc-a nail ganl

²⁴ Niil aq-il, ngal nuljuq nail haqbhoil haq dee a oq deede nail bhai ya daq nail neq, ngaq-ai lavqkhiq tsail-ail nial. Khali-i mail maq ya daq gil-a nail haq dee a oq deede nail juq bhee lai dai, aivq nail aqmaol nail haqbhoil ngaq nail aqmaol lavqkhoel bhai ngal daq thailthaiq nail ngaol. Aivq nail aqmaol dai ge nail neq, Khali yaq munl bhai ge nail ngaol. ²⁵ Miqyail nail daoq teevq bhee bhi heeq bhi gaiq-ail nia dai, Miqyail ngaq bhai tsel dov-ai tha q nail khe-ai, ngal neq, nuljuq nail haqbhoil ganl niil nl yaoq dai, aivq ngaq bhai khoel-ai tha q nail ngaol. ²⁶ Milnee uqnee Miqyail-i mail teevq yeel nee teevq yeel oiltsail-ai tha q nail aivq nail daoq al, niil aq-il, aivq aivq nail tsaol-aq juq bhai phaodaiq bhiq nail ngaol. ²⁷ Yu nail jeq-e jaq-a nail haqbhoil

Miqyail-i mail oiltsail-ai thaq nail daoq al neq, seiqlieiq khaoqsail khadai eeq khadai meeq nail ganl, aivq aivq nail tsaol-aq bhai bhi heeq nia movq nail ngaol. Nuljuq iqsanl yu nail jeq-e jaq-a nail lavqkhoel bhai aol nail ngaol. Oiltsail-ai thaq nail daoq al neq, Khali nuljuq nail lavqkhoel bhai jaol nail ngel-i mail, nuljuq seiqlieiq khaoqsail al bhai ya dai, noeqtunq nail phaqq jiaq nail ngaol.

²⁸ Nvjuq aivq nail ganl daoq cavq cavq nail ngaol. Khalhai khi ngaol-aq, tsaol-aq yaoq gaq yaoq-ao nee Khali nail lavqkhoel bhai bhee lal khi, nvjuq aqyu juq bhai Miqyail nail sivtavq-ai av bhiq kivq dai, "Yaolphaol yaoq dei-eiq" dai, nvjuq tsaol-aq yaoq gaq yaoq-ao nee bhai ge bhi nail nee ovqtavq, neenoeq neekha iqsanl mail yuq yuq-ail, cavq bhiq cov bhiq thailthaiq nail ngaol. ²⁹ Al nail haqqbhoil ngal laijai deede nail ngaol. Khali ngaq bhai bhaqqaoq bivq lavq khi, aivq ngaq nail lavqkhoel bhai ganl nl thailthaiq nail khe-ai, ngal iqsanl laijai deede nail ngaol.

2

¹ Nuljuq nail haqqbhoil maqqkhaiq, Laoldilciv meenq bha jaol nail juq nail haqqbhoil maqqkhaiq, ngaq bhai maq moel daiq-a nail juq nail haqqbhoil maqqkhaiq, ngal khadai laijai nail ngel-ail dai, nuljuq bhai bhi heeq kivq movq-ail nial. ² Goil nail gaiq-a nail lavqkhoel neema teevq heeq bhai tavq lal dai maqqkhaiq, neema gaq kav lal dai maqqkhaiq, ngal nl thailthaiq nail ngaol. Al bhaqda nee, Miqyail-i mail oil tsail-ai thaq nail Khali bhai tavq nail phaqq bhai aqyu juq gov heeq nia lal khi, heeq nia nail neenoeq neekha teevq

bhee aol lal nail ngaol. ³ Khali nail lavqkhoel bhai, aqphoiq phoiq deedee nail neenoeq neekha khi noeqheeq noeqmoel nia nail yaoq pha q yaoq-ao nee, oiltsail-ai tha q nail ngaol. ⁴ Kha q sil ga q ma qkhai q, naldai q mee q nail dao q ge ge-ail, nulju q bhai ma q ya hev q bheel-aiv q dai, ngal nia ilhai ge nail ngaol. ⁵ Khul khi mail dai ngal-aq neq, ngal nulju q nee ma q jaol khi ngaol-ao q neq, nga q nail neema nulju q nee mail jia v nail ngaol. Nulju q teev q pha q gil ha q teev q pha q aqdu q aqtsil tsil dai, nl nail bhai ma qkhai q, Khali nail lavqkhoel neema tha qtsaol nail pha q iv q deedee nail bhai ma qkhai q, ngal ya moel-a nail ngel-i mail, lavqkhi q tsail-ail nial.

⁶ Nulju q Heeqpha q Yeiqsul Khali bhai hav bhoel-a nail khe-ai, aiv q bhai ju q ju q-ail aqdoev q doev q yao q. ⁷ Dao qtsail kha-ail nail khe-ai, nulju q aiv q nail lavqkhoel bhai kha-ail khi, ee q lal mee q lal yao q. Nulju q-i mail ya saol oil-a nail khe-ai, neema tha qtsaol nail pha q nail lavqkhoel ivqdao dai jaol khi, dee lai nail ma q bhao dai, Miqyail bhai tsiqee q yao q.

Khali bha qda nee bhee lal-a nail gan l

⁸ Neenoe q neekha ma q aol nail dao q khi dao qceev q ma q jia v nail goiqbhao q bhao q nail dao q ge ge-ail, tsaol-aq teev q ga q-ail, nulju q bhai ma q ya nieil-aiv q dai, yaolphaol yao q dei-eiq. Dao q al ju q neq, Khali bhai tav q nail ma q ngel-ail. Teev q yeel nee teev q yeel cav q khal leev q tha q nail dao q khi miltsa q bhai tav q nail aol ju q teev q-eel ngaol.

⁹ Khali nail lavqkhoel-ai Miqyail-i mail pevq nail phaḡ teevq bhee aol nail ngaol. ¹⁰ Nuljuḡ aivq nail lavqkhoel bhai bhee lal-aḡq nail ngaol. Aivq neḡ, uvthaiḡ nail juḡ khi bhaḡaḡḡ eeq nail juḡ iḡsanl nail kovtavq bhai uḡhuḡ ngaol. ¹¹ Nuljuḡ aivq nail lavqkhoel bhai bavkov uḡjaḡ oev-a nail ngaol. Aḡmaol bhai tavq nail phaḡ oev-a nail bhai ge nail maḡ ngel-ail. Khali bhai tavq nail bavkov uḡjaḡ oev nail dai ge nail neḡ, aḡsivq haḡjoil nail neenoḡḡ neelov khaonḡ ha-ail ceevq nail bhai ge nail ngaol. ¹² Nuljuḡ ulcuvq saol-u phao, aivq nee mail duḡpheeḡ-ai thaḡ nail ngaol. Aivq bhai bhi doevq kovq lal-a nail Miqyail ganl nl thailthaiḡ nail bhaḡaḡḡ bhai neema thaḡtsaol nail ngel-i mail, nuljuḡ aivq nee mail doevq kovq lal-a nail ngaol.

¹³ Nuljuḡ neḡ, oeqbal nl-a nail bhaḡda nee maḡkhaiḡ, aoldaoḡ kovḡdaḡḡ maḡ jiav nail bhaḡda nee maḡkhaiḡ, sil-ai thaḡ nail tsaol-aḡ pevq khi ngaol-aḡ, niil aḡ-il aivq nuljuḡ bhai Khali nee mail aḡdoevq bhi doevq lal khi, ngadao nail oeqbal iḡsanl bhai phaiḡ lavq-a nail ngaol. ¹⁴ Aoldaoḡ kovḡdaḡḡ bhai juḡ khi ngadao nail kovtavq bhai oeqbal thaḡ nail haoḡḡavq bhai aivq-i mail siv peivq-a nail ngaol. Aivq haoḡḡavq al keiv bhai lavḡyavq kovtavq-ai tavq thaiḡ nail lavqkhoel nee oil ha-a nail ngaol. ¹⁵ Lavḡyavq al nail kovtavq-ai, nḡtavq khi miltsaq nail gaiḡlaḡ bhai uvthaiḡ nail juḡ khi bhaḡaḡḡ eeq nail juḡ nail khi kha-ao tsai dov khi, tsaol-aḡ iḡsanl nail sivtavq-ai aḡyu juḡ bhai bhi haḡsil-a nail ngaol. Lavḡyavq bhaḡda nee aivq al juḡ bhai ḡaḡ lai-a nail ngaol.

¹⁶ Alheel ngel-i mail, jaq nail daol nail ganl nee maqkhaiq, bhaoqaiq lav sav nail ganl nee maqkhaiq, lav lov lav ceiv lao nail ganl nee maqkhaiq, jaol n n-gaol lao nail ganl nee maqkhaiq, al juq bhaqda nee yu nuljuq nail kovtavq-ai oeqbal thaq lal nail bhai thaq naldaiq. ¹⁷ Al juq neq, yaqhao khe kev lee nail juq nail maolkhoel teevq-eel ngaol. Thailhai ngaol-aog, maolkhoel nail aqmaol neq, Khali ngaol. ¹⁸ Tsaol-aq teevq pav ganav juq, maq tsaq nail lavqkhoel nee, yovqgavq nail aqmaol bhai thaqttheq khi, nqtavq gaqkhoel bhai uqhuq thaoq nail ngaol. Aqyu juq neq, aqyu juq-i mail aqhaqlal nail lavqkhoel bhai ya moel-a nail juq bhai juq juq-ail, neema eeq nail ngaol. Thailhai ngaol-aog, aqyu juq neq, aqsivq haqjoil phao taivq-ail saol-nvq nia nail ngel-i mail, aqyu juq-i mail nl nail hal nail juq neq, khul nail ganl maq tsoiq-ail. Alheel nail tsaol-aq juq-i mail, nuljuq bhai yalkhaq thaq bhi dal. ¹⁹ Alheel nail tsaol-aq juq neq, uqhuq pevq nail Khali bhai aqmeeq-ai maq covq cavq-ail. Miqyail neema tsaq nail khe-ai, uqhuq al bhaqda nee aqmaol maol lao-ail eeq lal nail ngaol. Khil ceevq lavq ceevq khi haqguq haqlao juq covq cavq nail ngel-i mail, aqmaol maol lao-ail gaq aol lal eeq lal thailthaiq nail ngaol.

Khali nee mail sil khi gaoq doevq kovq lal-a nail ganl

²⁰ Nuljuq neq, Khali nee mail miltsaq bhai tavq nail aol juq bhai sil jel-ail ceevq-ao nail ngaol. Thailhai phal-iq neq, miltsaq bhai tavq

nail aol nail kov-uvq bhai khul khi mail aqdoevq gaoq doevq nail-aiq. ²¹ “Thaq nieivq thaiq, thaq mevqdaiq, thaq thoiqtsi” dai, ge-ai thaq nail aol juq bhai khul khi mail nuljuq gaoq thaoq nail-aiq. ²² Nuljuq al juq bhai thaoq-u phao, aol al juq neq, luq-ail seil ail-a nail ngaol. Khul khi mail dai ngal-aq neq, aol al juq neq, tsaol-aq-i mail thaoq khal leevq khi cavq bhi cov bhi nail aol juq teevq-eel ngaol. ²³ Yovqgavq bhai yovqgavq noeq dov khi uqhuq thaoq nail maqkhaiq, maq tsaq nail lavqkhoel nee neema thaqtmaq nail maqkhaiq, yovqgavq nail aqmaol bhai khoeq bhiq jioevq bhiq nail maqkhaiq, alhai nl nail juq neq, neenoeq neekha aol nail khe-ai dul khi ngaol-aq, aqsivq haqjoil phao neekhaol jiav nail juq bhai gaq lai dai, khul teevq phaqq iqsanl ganl maq tsoiq-ail.

3

¹ Nuljuq Khali nee mail doevq kovq lal-a nail ngaol. Thailhai phal-iq neq, nqtavq kovtavq bhai jiav nail juq bhai halpov yaoq. Khali neq, al bhai Miqyail nail lavqmal phao jaoldeel-nvq thaq nail ngaol. ² Miltsaq kovtavq khe jiav nail juq bhai thaq noeqcov-ai thaq. Nqtavq kovtavq khe jiav nail juq bhai noeqcov-ai thaq yaoq. ³ Khul khi mail dai ngal-aq neq, nuljuq neq sil nail tsaol-aq pevq khi, nuljuq nail aqdoevq doevq nail phaqq neq, Khali nee mail Miqyail nail lavqkhoel bhai oil tsail-ai thaq nail ngaol. ⁴ Ngadao nail aqdoevq doevq nail phaqq neq, Khali ngaol. Aivq dov lee-u phao, nuljuq iqsanl aivq nee mail seiqleiq khaoqsail nail lavqkhoel nee dov lee nail ngaol.

Neema aqsivq aqlil nail ganl

⁵ Nuljuq nail lavqkhoel khe aol nail, miltsaq bhai tavq nail juq bhai lav heivq yaoq. Al juq neq, khaqmiq sev nail, aqjiivq aqcavq pha q nl nail, yovqgavq nail neekhaol teevq sil doevq tavq jaol tavq movq nail, aqsivq haqjoil nail neekhaol nee nl movq nail, phul heel bhai neekhaol jia v nail, niil juq ngaol. Phul heel bhai neekhaol jia v nail pha q neq, thaoqphaoq aqma maolkhoel bhai uqhuq thaoq nail pha q pevq nail ngaol. ⁶ Al juq bha qda nee, Miqyail neema phail nail pha q kev lee thailthai q nail ngaol. ⁷ Jel lal-u phao, nuljuq iqsanl al juq nail haoqnao aqdoevq doevq khi, al juq bhai nl dai q hal dai q-a nail ngaol. ⁸ Thailhai ngaol-a oq, niil aq-il neq, nuljuq niil juq bhai khaonq ha yaoq. Neema phail nail pha q, neema bhao nail pha q, yu bhai neejia v jia v nail pha q, yu nail haoqnaol phao nee khal ge movq-a il ge nail pha q khi, aqjiivq aqcavq pha q nail dao q ge nail, niil juq ngaol. ⁹ Teevq ga q nail gaiqla q bhai teevq ga q goiqbhao q tha q bhao q. Khul khi mail dai ngal-a q neq, nuljuq neq, neema aqlil bhai iqsanl, neema aqlil nail aol juq bhai iqsanl, loev ha-a il ceevq khi, ¹⁰ neema aqsivq bhai doi-a nail ngaol. Neema aqsivq al neq, aivq bhai teivq-a nail Miqyail khe-ai dul lal nia dai, heeq nia moel nia nail phao, aqsivq pevq lal thailthai q nail ngaol. ¹¹ Neema aqsivq pevq lal-a nail lavqkhoel, Heiqlaqsal nail tsaol-a q khi Yuldav nail tsaol-a q dai, ma q tselpav yaoq-aol. Bavkov uqja q oev nail tsaol-a q khi bavkov uqja q ma q oev nail tsaol-a q dai, ma q tselpav yaoq-aol. Yaoqkhao q yao q mil yao q khe tsaol-a q khi aolsaolkovq ma bhao nail

tsaol-aq dai, maq tselpav yaoq-aol. Yaqkav khi yaqkav maq ngel nail juq dai, maq tselpav yaoq-aol. Khali neq, iqsanl mail pevq khi, iqsanl nail lavqkhoel bhai jaol nail ngaol.

¹² Nuljuq neq, Miqyail mao-ail gaiq-a nail aivq-i mail tsel dov-ai thaq nail tsaolmeeq tsaolhaol ngaol. Alheel ngel-i mail, yu bhai gaoqhaq gaiq-a nia deede nail, yu nail haqbhoil aqmeeq phaql nail, yovqgavq nail aqmaol bhai thaqtseq nail, neema neenuq neebeiv aol khi, neenoq heelma ma dai noeq nail, nuljuq aqgaq aqdoi doi nail khe-ai doi yaoq. ¹³ Teevq gaq nee teevq gaq ol ol-ail doevq yaoq. Teevq gaq nail kovtavq-ai teevq gaq oeqbal thaq nail phaql jiaq haq neq, teevq gaq nee teevq gaq oeqbal phaql yaoq. Heeqphaql Yeiqsul nuljuq nail oeqbal bhai phaql-a nail khe-ai, nuljuq iqsanl teevq gaq nee teevq gaq oeqbal phaql yaoq. ¹⁴ Al juq iqsanl nail kovtavq bhai, goil nail gaiq-a nail phaql doi dav gai yaoq. Goil nail gaiq-a nail phaql neq, iqsanl bhai bhee lal dai, leel jaoq-ai thaq nail ngaol.

¹⁵ Khali nail neesal-ovq nail phaql nuljuq nail neema bhai bhi uvthaiql yaoq. Alhai bhi uvthaiql nail dai khi, aqmaol teevq maol teevq-eel nail lavqkhoel, Miqyail nuljuq bhai khul-ai thaq nail ngaol. Aivq bhai tsiqeeq nail neema aol aol-ail doevq yaoq. ¹⁶ Khali nail daoq nuljuq nail lavqkhoel bhai bhi bhao bhi ya lee yaoq. Neenoq neekha teevq bhee aol nail lavqkhoel tsiqeeq nail daoq, tsiqeeq khi aqthel gul nail daoq khi, aqhaqlal phao tavq lai nail daoqdaq daq nail daoq juq bhai juq juq-ail, teevq gaq nee teevq gaq cavq bhiql cov bhiql khi gaq bivq

yaoq. Nuljuq nail neema lavqkhoel-ai, Miqyail bhai gul gul-ail tsiqeeq yaoq. ¹⁷ Nuljuq daoq ge nail maqkhaiq, nl nail hal nail maqkhaiq, khul pha q nl khi ngaol-aoq, Heeqphaq Yeiqsul nail aqmil kov-uvq nee nl yaoq. Aivq bhai juq juq-ail, Aqbhu Miqyail bhai tsiqeeq yaoq.

Khali yaq nail ildaoq lavqkhoel bhai ya nl nail ganl

¹⁸ Khaqma juq-ol, yovqgavq nail yovjil nail kov-uvq bhai aqmeeq-ai jaol yaoq. Niil neq, Khali yaq nl heeq pha q-ail tsa q nail ganl ngaol.

¹⁹ Ya qyov-aq juq-ol, yovqgavq nail khaqma bhai gaiq-a yaoq. Aivq bhai neema tha q nal.

²⁰ Ya q juq-ol, yaoq pha q yaoq-ao nee nail lavqkhoel yovqgavq nail aqbhu aqma nail daoq bhai naldai q yaoq. Khul khi mail dai ngal-aq neq, nuljuq alhai naldai q nail bhai Miqyail neema tsa q nail ngaol.

²¹ Aqbhu juq-ol, nuljuq nail ya q neema phail lal heeq pha q-ail tha q nl bhiq. Nl bhiq ha q neq, neema cov-ail la geiq.

²² Ya qkav juq-ol, yaoq pha q yaoq-ao nee nail lavqkhoel, nuljuq nail ilheel nail daoq naldai q yaoq. Aqyu juq ya moel dai taivq-ail, maivphaoq ya dai, nl nail hal nail pha q tha q bhi pevq. Neema daolcoev dai tha q tha q-ail, Heeqphaq Yeiqsul bhai ev nail lavqkhoel nee nl yaoq.

²³ Nuljuq-i mail khal nl khal hal nail khul pha q maqkhaiq, tsaol-aq nail haqbhoil nl nail ngaol dai, tha q saol-nvq. Yeiqsul nail haqbhoil nl thailthai q nail ngaol dai, saol-nvq khi, aqmaol neema kev nail lavqkhoel nee nl yaoq hal yaoq.

²⁴ Yaqhao khe nvjuq-i mail ya nail geeqlaoq neq, Yeiqsul-i mail bivq lavq nail jaiqbhoil ngaol dai, nuljuq heeq nia nail ngaol. Khul khi mail dai ngal-aq neq, nuljuq neq Heeqphaq Khali nail yaqkav ngaol. ²⁵ Nl laiq-a nail tsaol-aq, al nail haqbhoil yalkhaq dal nail bhai ya daq nail ngaol. Miqyail neq, maivphaoq eeq nil maq tsel-ail.

4

¹ Ilheel juq-ol, nuljuq nail yaqkav juq bhai aqtsaq aqdaol daol dai, teevq di dai, nl bhiq yaoq. Nuljuq nail ilheel gaq iqsanl, nqtavq kovtavq-ai jaol nail bhai, thaq niolpeivq dei-eiq.

Khoel-ail ceevq-a nail ganl

² Khaq mao iqsanl gaq maq bhaq dai, geeqlaoq hal hal-ail jaol yaoq. Geeqlaoq hal-u phao, aqgeel geel dai, Miqyail bhai tsiqeeq tsiqeeq-ail, hal yaoq. ³ Khali nail ganl oiltsail-ai thaq nail pha q bhai tavq nail Miqyail nail daoq bhai nvjuq cavq bhiq kivq dai, Miqyail gailkhaol phao lavq nail haqbhoil geeqlaoq hal tsao lavq yaoq. Khul khi mail dai ngal-aq neq, ngal Miqyail nail daoq cavq nail ngel-i mail, niil aq-il thaonq bhai ya aol thailthaiq nail ngaol. ⁴ Alheel ngel-i mail, ngal ya ge heeq pha q-ail tsa q nail daoq al juq bhai, yu gov heeq nia dai, cavq bhiq kivq nail haqbhoil iqsanl geeqlaoq hal tsao lavq yaoq. ⁵ Yeiqsul bhai neema maq tha qtsaol nail juq nail sivtavq bhai neeno eq neekha aol nail tsaol-aq pevq yaoq. Aqyanq khal ya-u phao, teevq peivq-ail ma q bhi sunq-ail dai, nl thailthaiq yaoq. ⁶ Tsaol-aq yaoq ga q yaoq-ao nee bhai khalhai ya ge kovq bhiq

nail dai heeq nia lal dai, nuljuq daoq ge-u phao, khaq mao iqsanl yu loq nail bhai tsaq lai nail daoq khi naldaiq meeq nail daoq taivq-ail ge yaoq.

Haoqnao naosaq khe daoq

⁷ Ngal mailma-ail gaiq-a nail jaqbheq Duljil neq, ngaq nail ganl iqsanl mail nuljuq bhai ge lavq nail ngaol. Aivq neq, ngaq-ai nee mail Miqyail nail ganl nl nail lavqkhoel, saljial ivq nail ganl nl nail gaq ngaol. ⁸ Nvjuq khalhai pevq thailthaiq nail dai, nuljuq ya heeq kivq dai maqkhaiq, aivq nuljuq nail neema bhai gaq bhi kav lal dai maqkhaiq, ngal aivq bhai nuljuq jaol nail bha bhi lal naol. ⁹ Al ovqtavq, nuljuq nail munl lavqkhoel khe teevq gaq pevq nail, ngadao mao-ail gaiq-a nail saljial ivq nail jaqbheq Aolneiqsiqmul bhai iqsanl, aivq nee mail bhi lee naol. Niai khal pevq lal thailthaiq nail yaoq pha q yaoq-ao nee aqyu nvq gaq nuljuq bhai ge lavq nail ngaol.

¹⁰ Ngaq-ai nee mail teevq gaq khe-ai thaonq bhai aol thailthaiq nail Aqliqdaqgul neq, nuljuq bhai noeq moel naol dai, daoq cavq cavq bhoel-ai lavq-a nail ngaol. Bhaqnaqbhal nail jaqbheq Maqkul iqsanl, nuljuq bhai noeq moel naol dai, daoq cavq cavq bhoel-ai leevq-a nail ngaol. Maqkul nail ganl ngal nuljuq bhai daoq cavq cavq bhoel-ai leevq-a nail ngaol. Aivq nuljuq jaol nail bha lee haq neq, aivq bhai hav yaoq. ¹¹ Yulthul dai khul nail Yeiqsul iqsanl, nuljuq bhai noeq moel naol dai, daoq cavq cavq bhoel-ai leevq-a nail ngaol. Yuldav nail tsaol-aq nail

lavqkhoel khe, Miqyail Milkhaog nail haqbhoil niil aq-il ngaq-ai nee ganl nl thailthaiq nail juq neq, niil juq teevq-eel ngaol. Aqyu juq bhaqda nee ngal neesal ya deedee-ail nial. ¹² Nuljuq nail munl bhai tavq nail, Yeiqsul Khali nail yaqkav llbhaqphaqlal iqsanl, nuljuq bhai noeq moel naol dai, daoq cavq cavq bhoel-ai leevq-a nail ngaol. Miqyail neema tsaq nail yaoq pha q yaoq-ao nee nail lavqkhoel nuljuq yovkav eeq lal khi, ivq lal bhee lal dai, aivq nuljuq nail haqbhoil khaq mao iqsanl laijai laijai-ail, geeqlaoq hal nail ngaol. ¹³ Aivq neq, nuljuq nail haqbhoil maqkhaiq, Laoldilciv meenq khi Heiqlaqbhaollil meenq bhai jaol nail tsaol-aq nail haqbhoil maqkhaiq, khadai laijai nail ganl, ngal salkhil khanq kivq nail ngaol. ¹⁴ Nvjuq mao-ail gaiq-a nail jagaq coev nail saqlaq Lulkavq khi Deiqmav iqsanl, nuljuq bhai noeq moel naol dai daoq cavq cavq bhoel-ai leevq-a nail ngaol. ¹⁵ Laoldilciv meenq bhai jaol nail aqivq jaqbheq Khali yaq juq bhai maqkhaiq, Noqphal khi aivq nail ilkhaol bhai jil lai nail Khali yaq munl bhai maqkhaiq, ngal noeq moel naol dai, ge bhiq ail dei-eiq.

¹⁶ Haoqgavq niil nuljuq ge gaq haq neq, Laoldilciv meenq bhai jaol nail Khali yaq munl bhai iqsanl bhi ge daiq dei-eiq. Aqyu juq-i mail ya-a nail haoqgavq al iqsanl, nuljuq ge daiq dei-eiq.

¹⁷ “Yeiqsul-i mail naoq bhai bhi nl lavq-a nail ganl bhai nl gil-u phao kev dai, aqmeeq-ai nl-ail yaoq” dai, Aqgilpuv bhai iqsanl ge bhiq-ail dei-eiq.

18 Ngal neq, Paolluv ngaol. Nuljuq bhai noeq moel naol dai, ngaq nail aqlavq-i mail gevq bhoel-ai leevq-a nail ngaol. Ngal thaonq bhai aol thailthaiq nail bhai thaq niolpeivq dei-eiq. Miqyail nail geeqlaoq eeljaol nuljuq nail kovtavq bhai jiav dei-eiq.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022
aaaba9fd-8172-55cc-ad15-906f43ddb5a5